



LEKSYON 4
PANAGSABOT SA
KAMINYOON UG PAGKASAI

Matun-an Nimo Niining Leksyona

Panagkasabut sa Kaminyoon

**Pinaagi sa sumbanan sa Dios
Mga salapianong suliran
Ang gawi human sa panagkasabut**

Ang Kasal

**Ang pangkinahanglan sa gobyernong
sibil
Kasal sulod sa simbahan**

Pangandam Alang sa Kasal

PANAGKASABUT SA KAMINYOON

Pinaagi sa sumbanan sa Dios

Kasagaran, adunay panagkasabut sa wala pa ang kaminyoon. Nagkalainlain lamang ang kinaiya sa panagkasabut sa lainlaing nasud. Aduna tingali pagsaulog sa dihang ang duha ka managhigugmaay magpadayag na nga sila magminyo. Tingali, ang uban magbayloay ug singsing ingon nga handumanan sa usag usa. Ang tanang kinaiya sa panagkasabut madawat sa mga Kristohanon basta dili lamang mosupak sa kabubut-on sa Dios. Ang mga Kristohanon dili gayud mosunod sa mga batasan nga dili makapahimuot sa Dios.

Ang tuyo sa usa ka Kristohanon mao ang pagpasidungog sa Dios ug magpahimuot Kaniya sa tanang butang sa iyang kinabuhi. Nagkinahanglan ang mga Kristohanon sa panalangin sa Dios sa ilang kaminyoon, busa pasidunggan nila Siya bisan sa paagi sa pagsaulog nila sa ilang panagkasabut. Dili nila himoon ang higayon sa ilang panagkasabut alang sa paghuboghubog bisan pa kon kini maoy kinaiya sa ilang panimalay.

I Corinto 10:31. Bisán unsay imong buhaton, bisán unsay imong kan-on o imnon, himoa kini alang sa himaya sa Dios.

Buhata Kini

1. Unsa mang batasana sa panagkasabut sa kaminyoon nga pagasundon sa mga Kristohanon?

2. Unsa man ang dakung katuyoan sa Kristohanon?

3. Ngano man ang gikinahanglan man sa mga Kristohanon nga pasidunggan nila ang Dios sa paagi sa ilang pagsaulog sa ilang panagkasabut?

Mga Salapianong Suliran

Kadaghanan sa dapit sa kalibutan, ang usa ka lalake mohatag ug bugay ngadto sa mga ginikanan sa babaye nga iyang pagaminyoan. Adunay dapit usab nga ang ginikanan sa babaye maoy mohatag ug bugay ngadto sa lalake o sa iyang ginikanan.

Daghang mga dapit usab nga dili na sila mohatag ug bugay, apan ang lalake mangutang alang sa usa ka mahalong nga singsing. O ang pangasaw-onon ug ang iyang ginikanan mogasto ug salapi nga labaw pa hinoon sa ilang pagasto sa ilang panagsabut ug sa kasal.

Aduna niining mga kinaiyaha nga malisud alang sa mga batan-on sa pagkaminyo kon dili sila mga adunahan. Ang uban magtuman na lang ug magpuyo nga dili maminyo. Hinoon, ang mga Kristohanon gustong mahimuot ang Dios kanila, ug dili sila buot nga maulawan ang Dios ug ang maayong balita pinaagi sa pagpuyo sa sala.

Kinahanglang mahimatngong ang mga Kristohanong ginikanan nga dili kaayo importante ang bugay kondili ang kristohanong kinaiya sa tawo nga pakaslan sa iyang anak. Dili sila mamugos sa usa ka hataas nga bugay o mahalong regalo o kasal.

Ang kaslonon usab dili mogasto labaw pa sa ilang maabut. Usa ka dili maayong sinugdanan sa kaminyoon ang pagpangutang alang sa kasal.

Buhata Kini

4. Nganli ang tulo ka butang nga usahay mahitabo kon ang duha ka managhi-gugmaay dili makaabut sa galastohon sa kasal o walay ikahatag nga bugay.

5. Unsay hunahunaon sa mga kristohanong ginikanan nga labing importanteng butang mahitungod sa tawo nga pagaminyoan sa ilang anak?

6. Unsay buhaton sa mga kaslonon mahitungod sa mga galastohon.

Ang gawi human sa panagkasabut

Kasagaran, maayo alang sa managhigugmaay nga magkasuod panahon sa panagkasabut sa ilang mga ginikanan. Makaplano sila sa ilang panimalay ug sa ilang kinabuhi. Makahimo sila sa pagkuha sa mga butang nga ilang kinahanglanon sa ilang panimalay.

Ang uban mosamot ang ilang panagkasuod tungod kay sila nagplano na man nga magminyo sa dili madugay, apan magalikay gayud ang mga kristohanon sa mga pagtintal. Hinumdumi ang sumbanan sa Dios. Ang panagkasabut dili kaminyoon. Dili kini katiawtiawan tungod kay adunay posibilidad nga kini dili matuman.

Kinahanglan kang magpailub human sa inyong panagkasabut. Ayaw pagbuhat ug butang nga makapahimo sa mga tawo sa pagsaway kanimo, sa imong hinigugma, o sa ebanghelyo. Hinumdumi si Jacob, nga nagabuhat sulod sa pito ka tuig ingon nga bugay alang kang Raquel.

Genesis 29:20. Ug si Jacob mialagad ug pito ka tuig alang kang Raquel; ug ingon sa pipila lamang ka adlaw alang kaniya tungod sa iyang gugma alang kaniya.

Buhata Kini

7. Giunsa man pagpamatuod ni Jacob ang iyang gugma kang Raquel?

ANG KASAL**Ang pangkinahanglan sa gobyernong sibil**

Ang mga Kristohanon magkuha gayud sa kinahanglanong mga papeles aron ang kasal dili mahisupak sa balaod sa nasud. Nagalakip kini sa sertifico sa pagkatawo, sertifico sa panglawas, ug unya ang lisensiya sa kasal.

Dunay mga tawo nga nanag-ipon nga wala makasal. Aron mapahimuot ang Dios ug mabatonan ang maayong pagpamatuod, kinahanglang tagboon nila ang gikinahanglan sa gobyerno aron ang ilang kaminyoon mahimong pinasubay sa balaod. Sa ingon niining paagi, ang amahan maghatag ug kadungganan sa iyang asawa ug mga anak ug makabaton ug panalipod gikan sa gobyerno.

Buhata Kini

8. Unsa mang mga papelesa ang pagaandamon sa mga kaslonon sa dili pa sila makasal nga pinasubay sa balaod?

9. Nganli ang duha ka katarungan ngano nga ang usa ka Kristohanong kaslonon kinahanglan man nga magpakasal pinasubay sa balaod?

Kasal sulod sa simbahan

Ang tanang gikinahanglan sa gobyerno kinahanglan nga maandam na sa wala pa ang kasal sulod sa simbahan. Sa ubang nasud, duna unay kasal sa sibil sa dili pa ang kasal sa simbahan.

Sa usa ka kasal nga kristohanon ang babaye ug ang lalake magahimo ug dayag nga pakigsaad sa usag usa atubangan sa Dios. Magasaad sila nga mahigugma, magpasidungog, magpanalipod ug magmatinumanon sa usag usa hangtud nga ang kamatayon maoy magabulag kanila. Ang ministro magasulti kanila sa ilang responsibilidad, magpaminaw sa ilang mga saad, ug magpahibalo sa kadaghanan nga sila asawa na ug bana, ug magapangayo sa panalangin sa Dios alang sa ilang panimalay.

Ang seremonyas sa sulod sa simbahan nagaila nga ang kaminyoon usa ka mugna sa Dios. Nagapakita usab kini nga ang magtiayon nagalantaw sa Dios sa Iyang tabang ug pagmando sa dihang sugdan na nila ang kinabuhing minyo ug magtukod sa panimalay.

Adunay mga tawo nga mogasto ug daku alang sa kasal. Tingali, alang sa biste sa kasal, sa dayandayan o ang pag-abiabi ba sa mga kahigalaan ug mga paryente. Hinoon, buot gayud nimo nga mahimong matahum ang inyong kasal, apan mas labing maayo nga sa yano lamang kini himoon kay sa mosulod sa daghang utang.



Buhata Kini

10. Unsa man ang imong pagabuhaton sa wala pa ang kasal sa sulod sa simbahan?

11. Unsa may pakigsaad sa lalake ug sa babaye sa usag usa sa usa ka kristohanong kasal?

12. Ang usa ka kasal sulod sa simbahan nagapakita nga ang magtiayon nagalantaw ngadto sa Dios sa usa ka butang. Unsa man kini?

PANGANDAM ALANG SA KASAL

Kanus-a man ang managhigugmaay magplano sa pagminyong? Nagaagad kini sa kahigayonan. Kinahanglan nga ang duha hingkod na gayud sa pagsagop sa kaakohan sa kaminyoon. Kinahanglan hingkod na sila nga magkasabut sa usag usa inay maghunahuna lamang sa ilang kaugalingong kagustohan.

Ang kaminyoon dili usa ka tiawtiaw. Ang lalake kinahanglang mahibalo motrabaho. Kinahanglang aduna siyay buhat o mga paagi nga masustentohan niya ang iyang asawa ug ang pamilya. Ang babaye usab kinahanglang mahibalo mangluto ug sa mga buluhaton sa panimalay. Kinahanglan nga ang duha makasabut kon unsa ang ilang kaakohan sa kaminyoon ug magmasinugtanon nga motuman niini.

Labing maayo alang sa bag-ong magtiayon nga adunay ilang kaugalingong puluy-anan sa pagsugod sa ilang pamuyo. Tingali, usa kini ka gamay nga balay nga ilang plitehan o usa lamang ka yano nga dapit, sa paagi nga matawag kini nga ilang kaugalingon ug dili sa ilang ginikanan. Dili maayo alang sa bag-ong minyo nga moipon ug puyo sa ilang mga ginikanan ug kon mangipon man galing labing maayo nga sa hamubo lamang nga higayon.

Ang panahon sa panagsabut ug ang kasal mahimong usa ka labing malipayong higayon alang sa duha kon ilang sundon ang plano sa bios sa tanan nilang mga lihok. Ang pagsugod ug bag-ong panimalay nga gitukod sa Kristohanong patukorana maoy usa sa labing maayong mga paagi nga makagarantiya ug usa ka malampusong kaminyoon ug usa ka malipayong panimalay.

Buhata Kini

13. Kon ikaw wala pa maminyo, basaha pag-usab ang dapit "Pangandam alang sa kasal" ug susiha ang imong kaugalingon sa kada punto. Pangayoa sa Ginoo nga ikaw tabangan Niya sa dapit nga ikaw maluya, aron mabuhat nimo ang imong kaakohan nga magma-lipayon ug mahimong usa ka maayong kauban sa kaminyoon.
14. Pag-ampo alang sa mga batan-on sa imong simbahan nga ang Dios magapanalangin kanila sa ilang kaminyoon ug maghatag kanila ug panimalay nga nagapasidungog kang Kristo.
15. Susiha ang imong mga tubag sa sunod pahina.
16. Sulati ang imong rekord sa estudyante nga makita sa luyo sa basahon alang sa leksyon 4.

PAHALIPAY!

Natapos mo ang unang upat ka leksyon ning maong kurso. Karon sunda ang pahimangno sa katapusan sa mga pangutana alang sa leksyon 4. Anaa kini sa Rekord sa estudyante.

Mga Tubag sa Leksyon 4

Kon ikaw adunay 11 ngadto sa 12 ka mga hustong tubag sulati ug labing maayo; gikan sa 9 ngadto sa 10, maayo; gikan sa 7 ngadto sa 8 kasarangan. Kon ubus sa 7 ang imong hustong mga tubag basaha pag-usab ang leksyon.

1. Mga gawi nga nahiangay ug nahisibo sa suk-danan sa Dios.
2. Pagpasidungog ug pagpahimuot sa Dios.
3. Mga Kristohanon buot sa panalangin sa Dios sa ilang kaminyoon.
4. Ang uban nanag-ipon nga wala nagpakasal, nagkinabuhi sa dautan nga kinabuhi, o mi-sulod sa pagpangutang.
5. Kristohanong pamatasan.
6. Dili magagasto sa labaw sa maarangan.
7. Siya nagahago sulod sa pito ka tuig ingon nga bugay kang Raquel.
8. Sirtipiko sa pagkatawo, pagpahiling sa lawas ug lisinsya sa pagminyoy.
9. Pagpahimuot sa Dios ug pagkinabuhi nga matarung.
10. Mga kinahanglanong sivil andamon.
11. Sa paghigugma, pagpasidungog, pagamoma ug ang pagkamatinumanon sa matag-usa hangtud sa kamatayon.
12. Sa pagtabang, paggiya sa ilang pagsugod sa kinabuhing minyong pag mugna sa ilang panimalay.

Numero sa hustong mga tubag

Grado